

## Kochbuch M. Marx Rumpolts/

geuß heiße Butter darüber / so werden siereich vnd gut. Also magstu es trucken geben mit der Brüß / so ist es auff beyde manier gut.

201. Nimb Strauben / die gebraten seyn / hack sie klein / thu sie in heiß gesotten Milch / vnd laß sieden / biß dick wird / salß ab / vnd mach's braun / so ist es gut vnd wolgeschmack. Also kocht man die Straubenmüß.

202. Nimb durre Schlehen / koch sie in Wasser / vnd gib sie warm auff ein Tisch / besträu sie mit Zucker / so werden sie gut vnd wolgeschmack.

203. Nimb Spilling / wenn sie zeitig vnd weich seyn / streich sie durch ein Härin Tuch / vnd thu sie in ein Fischkessel / der vberzündt ist / thu Zucker darein / vnd laß darmit auffsieden / gib's warm auff ein Tisch / vnd besträu es mit Zucker / so ist es gut vnd wolgeschmack.

204. Mach ein Teig mit lauter Eiern vñ Mehl / zimlich hart / vnd wenn er wol gearbeitet ist / so treib in fein dünn auß / besträu dz Blat / das du hast außgetrieben mit lauterm Mehl / wickels vbereinander / vnd schneids fein klein / setz mit wasser auff in ein Fischkessel / vnd laß sieden / zeuch den Teig hinein / rürs mit einē Löffel / daß nicht zusammen kompt / rürs vmb / biß daß auffseudt / schüt es auff ein durchschlag / nim gesotten Wasser / das zimlich gesalzen ist / wasch die Nudel darmit auß / nimb ein geriebē Parmesan käß / vnd geriebenen Beck / oder gerieben Ruckenbrot / thu es durcheinander / vnd wenn du es wilt anrichten / so schüt den Käß am ersten an den Boden / vnd richt die Nudel darein an / besträu es darnach mit Käß vnd Brot / geuß heiße Butter darüber / so wird das Brot fein resch / deck's flugs zu mit einer Schüssel / vnd gib's warm auff ein Tisch. Also richt man die Nudel zu / sonderlich in der Graßschafft Eyrol.

205. Mach ein Teig mit Eyerdottern / Butter vnd Mehl / arbeit in wol / treib in vber die Hand in die höh / dz er fein stehen bleibt / thu ein wenig Butter darein / scheubs in Ofen / vnd laß ein wenig backen. Nimb Eyer / Mehl / vnd ein wenig Milch durch einander / streich's durch ein Härin Tuch / salß's ein wenig / vñd geuß in die außgetriebene Pasteten / laß backen / vñd gib's warm auff ein Tisch / besträu es mit Zucker / oder gib's kalt / so ist es auch gut vnd wolgeschmack.

206. Kür ein Teig an mit Eiern vnd Milch / mach in nicht gar zu dick / nimb Butter in ein Pfaumen / mach sie warm / vnd rür den Teig in die heiße Butter / richt es warm an. Also macht man das Bergmüß / das auch nicht böß ist.

207. Nimb Ungerische Pflaumen / vñ thu die Kern heraus / sonderlich wenn sie durr seyn / stoß sie in einem Mörßel / vñd streich's durch ein Härin Tuch /

Tuch/